

Scuperta

A notte falava nantu à a Sardegna è à pocu à pocu, e strette si facianu diserte. Qualchì ritardatariu marchjava d'un passu decisu, pressatu d'arritruvassi in casa soia cù a so famiglia. Cù issu fretu nimu avia a voglia di stà fora ! Di quandu in quandu, un acula marina chì stendia u so volu sopra à e case chì fumavanu, strappava u silenziu cù u so gridu putente è acutu.

Nantu à a rena di a piaghja d'Olbia, un omu stava à fighjulà u mare d'un'aria pinserosa. Serà statu u fretu d'issa notte d'inguernu o a sprufundezza di u so pinsà chì l'impidia di movesi ? L'acula parse dumandassi la anch'ella è passendu sopra à ellu, lampò un gridu stritente. Òn sò s'è l'omu capì ma pisendu u capu versu l'acellu disse d'una voce trista è addisperata :

« S'eo pudia esse cum'è tè, acellu beatu, tù ch'ùn ai nè cunfine, nè paese. Poi girà lu mondu sanu quand'eo sò incappiatu in terra. Òn possu ch'è sunnià di francà u mare quand'è tù passi d'una sponda à l'altra secondu à u to vulè. Impresta mi e to ale pè un ghjornu da ch'eo possa cuntinuvà u mio viaghju ind'u Mediterraneu. » Sentendu isse parolle, l'acellu si spunì nantu à a rena, à cantu à l'omu chì s'era rimessu à fighjulà u mare è li disse :

« Cunfine ùn ne aghju ma paese ne aghju unu : a Corsica è puru s'eo t'aghju a pussibilità di viaghjà secondu à u mio vulè, tornu sempre à ritruvà a mio Cursichella. S'è tù n'ai laziu, ti possu purtà culà, cusì puderei scopre un'antra isula di u Mediterraneu, un'antra isula di bellezza. »

Da primu, l'omu fù impauritu di sente parlà l'acellone ma quantunque, cuminciava à esse avvezzu à a stranezza di u Mediterraneu. Issu locu fattu di cuntrasti, d'un ambu à tempu incantevule è umbrosu, empiu di a so storia, di e so tradizione, di e so fole è di i so stalvatoghji, face esce i sintimi più strani da l'essere prufondu di l'omu.

Issa prima reazione passata, l'omu rispose :

« Chì bella pruposta ch'è tù mi faci, o cumpà ! Seria allegru di scopre u to paese, masimu più pigliendu l'aria falcone ! »

Tandu, s'incruccò nantu à u corpu putente di l'acellu chì pigliò u volu senza difficoltà.

In u celu stellatu di a Sardegna, da Olbia à Cagliari, si pudia vede u spettaculu maravigliosu d'un omu chì s'alluntanava purtatu da un acellu. Sottu à elli, si sentia a ballata calma è serena di u mare, ciò chì fece nasce un surrisu nantu à e labre di l'omu.

L'alba si pisava quand'un odore stranu fattu d'arburi è di terra empì i so nari.

« Eccu a mio terra chì s'avvicina, disse l'acellu, a Corsica si musca prima di vedesi. »

Pocu à pocu, u sole cuminciava à vince a so battaglia contru à a notte è quand'elli arrivonu vicinu à Bunifaziu, u sole ghjettava raghji luminosi chì ribumbavanu nantu à l'elpale. Tandù, u mare turchinu luccicava è paria essesi vistutu di millaie di ghjuvelli pè accoglie u visitore. Quellu avia u fiatu tagliatu di pettu à tamanta bellezza, ghjè vera chì certe volte a natura ci pò mette à disagio.

L'acellu ùn si piantò è francò issu marosulu di culore trà mare, sole è petra d'un volu rigularu è assicuratu.

Subitu subitu u paisaghju cambiò ciò chì stantarò u girandulone. L'Alcudina, tutta incurunata di neve, d'una bianchezza immacolata, spuntava à l'orizzonte.

A natura corsa pare d'avè tenute è vernice di u passatu è ogni locu palesa un pezzu di storia. Di fatti, s'è u litturale bunifazincu paria cuntà a Corsica assaltata, marturiata, rivultata, a muntagna ci dica u so rollu salvatore in tempu d'invasione. L'omu pruvava d'alduci u so soffiu chì pè sparì lu mondu ùn averia vulsutu rompe l'armunia d'issa natura è purtante tanti l'anu fattu nanzu à ellu. In issu locu di pace, li parse d'avè trovu un rifugiu ma a tracorsa agile è rapida di e muvre nantu à e petre li rammintò qualesse eranu e regione di a muntagna.

Ind'u meziurnale, u sole era altu in celu è l'omu patia da u so calore. Fù per ellu un sollevu d'arritruvà a friscura di a furesta di Vizzavona.

Ghjuntu in Corti, l'omu scuprì a cittadella cù a testa di moru chì sventulava. Tandù, l'acellu lampò un gridu rozu è feroce chì fece trasaltà l'omu.

« Scusa mi d'avetti fattu paura, disse l'acula ! Simu in Corti, sai, è issu locu hè empiu di a memoria di u mio populu ! U governu di a Corsica indipendente era stallatu quì, Corti hè sempre stata u pulmone di u mio paese, a sintinella di a nostra storia ! »

Dicendu quessa, l'acellu viaghjò più in furia sin'à a Castagniccia. Quaghjò, ripigliò un volu più serenu pè lacà u visitore ammirà e fureste di castagne, pricisendu ch'issu fruttu hè sempre statu adupratu ind'a cucina corsa è ci hà permessu d'ùn pate mai a fame, puru in tempu di dicetta ! Passendu sopra à Merusaglia, l'acellu ùn si scurdò di salutà à Pasquale PAOLI, u Babbu di a Patria.

Infine, l'acula si piantò in u picculu paese di Macinaghju.

« Eccuci ind'è mè, feci rimarcà l'acellu. Avà ai traversatu a Corsica da Bunifaziu à Capi Corsu, da u Nordu à u Sudu ! »

« U to paese hè bellissimu, o acula marina è ti ringraziu d'esse statu a mio guida » rispose l'omu.

« M'hà fattu piacè di pudè aiutatti, disse l'acellone, ma ciò chì mi rallegreria u più seria di vede chì al di là di a bellezza di i paisaghji, t'ai da esse capace di vede ciò chì tanta ghjente si scorda di circà, a bellezza di a mio ghjente. »

Ghjuvanna PAOLACCI

PENITENZA

In issa matina di veranu, tutti i zitelli di u paese di Vignale eranu isciuti fora à a spiccera senza mancu aspettà a fine di Goldorac per vede l'arcubalenu chì sulcava u celu. U sole fieru di marzu l'ingutuppava da i so raghji luminosi ciò chì facia nasce stelle luccichente chì parianu tanti ghjuvelli spargugliati in l'aria, quassù, alti alti.

Videndu issu spettaculu incantevule, i zitelli lamponu gridi è risate di sullacaria maiò chì si sentinu sin'à u purcile di Dumenicu, l'ultimu pastore di u paese.

D'un colpu, sottu à l'ochji meravigliati di i zitelli, si vidì un omu sculigne longu à l'arcubalenu è falà in terra. Sopracitati, accorsinu tutti à vede qual'ellu era u magu capace di rializà parechje prove! In u purcile di Dumè si sentianu grugnulimi di scuntu. I primi eranu emessi da u povaru Ignaziu ch'era cascatu in piena fangaglia à mezu à i purcelli. L'altri venianu da i porchi stessi ch'issa visita impreveduta durante u so bagnu, scumudava.

- Porca miseria! gridò Ignaziu, ùn sò mancu capaci à calculà u locu d'atterraghju, lonzi ch'elli sò!

- Ai da cascà in un campu di fiori, ch'elli dicianu issi bugiardi ! A sapia bè ch'eo mi facia ingannà. Sò troppu bravu, a vi dicu eo !

I zitelli, intrati in u purcile stavanu à sente à tempu impauriti è curiosi.

- Ùn mancava più chè quessa, pinsò Ignaziu, videnduli affaccà à pede vulpini. O zitè, site soli à avè mi vistu? dumandò.

-Iè, rispondinu in coru i zitelli.

- Megliu cusì, disse Ignaziu sottu voce. Allora, sintite, quessa hà da firmà un secretu trà noi altri. Vi piacenu i secreti, ùn hè ? Acqua in bocca ! Andate à ghjucà avale.

Senza mancu aspettà, si n'andetu i zitelli saltendu cum'è capretti. In fattu, ùn avia nunda d'un magu Ignaziu, è Goldorac ùn seria mai cascatu di culu in a fangaglia, ellu !

Dopu avè pruvatu à nettà i so vestiti, decidì Ignaziu d'andà si ne in casa soia. Ùn ci era fiatu in paese è ne fù stunatu, ma prestu fù rincuratu d'arritruvà a so casa sempre à listessa piazza. A porta era aparta è Ignaziu entrì.

Patia a fame è decidì di falà in cantina à buscà si à manghjà. Ma ùn ci era nunda in quella cantina, mancu più l'arnesi da preparà u furmagliu.

- Quessa serà a famiglia di Francescu chì ci anu arrubatu tuttu, pinsò Ignaziu. È noi simu à meritu, à meritu !

Fora a banda di i zitelli si spiazza cum'è un buffulu di ventu. Escì fora Ignaziu è i chjamò:

- O zitè! Andate à dumandà à Ziu Francescu u so cullonu.

I zitelli si campavanu da e rise è sta volta ùn capia più nunda Ignaziu!

- Chì ci hè? Avete intesu ciò ch'eo vi aghju dettu?

- Per avè intesu, avemu intesu rispose unu di i zitelli trà duie scaccannate, ma Francescu hè magru chì pare un palu di fasgiolu, allora culone po ùn ne hà !

- O i scrianzati, disse Ignaziu, chì capia l'urigine di u sbagliu. L'aghju à dì à i vostri parenti. Andate puru ch'in la mio epica, mai ùn averia avutu l'ardì un zitellucciu di burlà si d'un vechju. Ùn rispittate più nunda !

I zitelli cuntinuavanu à spampanà si è issu rimore impenserì l'omi maiò è ne feci affaccà unipochi. Da luntanu, s'era avvistù Michele ch'è i zitelli s'eranu aggruppati davanti à a so casa. S'avvicinò dunque è truvò à Ignaziu stallatu :

- Mi pudete spiegà ciò ch'è vo fate quì ? dumandò Michele.

- È voi, chì fate in casa meia ? rispose Ignaziu ch'avìa pocu laziu di riceve a ghjente pè u mumentu.

- Piantate subito a vostra cummedia, disse Michele sentendu si inghjuliatu da a baldanza d'Ignaziu. Comu vi chjameti ?

- Prima voi, lampò Ignaziu.

- A mumentu v'aghju da fà vede comu mi chjamu ! gridò Michele.

- Aiò, calmate vi puru, sò sicuru ch'è vo avete da capisce. Sò Ignaziu di i Piduchjò, ma pidochji ùn n'avemu mai avutu ! Allora avale mi pudete risponde ancu voi, disse Ignaziu.

- Sò Michele di i Topi è vi dumanda di sorte di a mio casa, significò u prupietariu.

- Sangu la Madonna, si lamentò Ignaziu, i Topi ci anu presu a casa. Ma ùn ci ferma più nunda à noi, disgraziati ch'è no simu!

- Sintite, disse Michele chì facia sforzi tamanti da stà calmu, ùn vi cunnoscu nè da vicinu nè da luntanu è un aghju nisuna voglia di liticà mi cù voi. Allora andate vi ne prima ch'ella mi salti a futta !

- Avà sì, chì s'imbrutta l'affare, pinsò Ignaziu chì si n'andò senza fà mottu, ma ùn li paria mancu vera quessa !

Famitu è senza casa, viaghjò durante ore sane, u spiritu carcu à ricordi è u core à l'abbandonu. In fine, à l'annutà, si ficcò ind'una sapparella è cascò cum'è un saccu.

U lindumane, discitatu ch'ellu fù da a corsa lesta di a capra tintinnaghja, decidì Ignaziu d'andà si ne anch'ellu à spassighjà per issi prati à mezu à l'animali.

Strada facendu, aritruvava pianu pianu u solcu cù a terra materna empiendu i so nari da i profumi imbalsamati di a machja, accarizzendu e petre cù gesti lenti è misurati quant'è ch'elle fussinù tanti animali salvatichi da ammansà. Però, rimarcò ch'è a petra ch'ellu manighjava avia una sesta particolare assai : era tonda quant'è una mela. Paria guasgi un ogettu geometricu è Ignaziu decidi di tene si la per ellu. Ghjè cusì, lampendu issa petra d'una manu à l'altra per spassatempu ch'ellu incuntrò à Matalena, a pasturella.

Videndu lu affaccà, si messi à briunà Matalena quant'è ch'ella avessi vistu a Squadra d'Arozza o qualchì spiritù:

- Lasciate quessa! Lasciate quessa, digraziatu ch'è vo site. Lasciate quessa o sinnò guai à voi !

U stupore si vidia nantu à a faccia d'Ignaziu. Tante storie pè una petruccia di nunda ! Simu bè luntani da a terra di u cumunu di a mio epica, pinsò l'omu ch'è si dumandava s'ellu facia un sunniacciu o s'ella era a verità. Oghje, ancu e petre anu un prupietariu. È l'arcubalenu, qualchissia m'hà da rimpruverà d'avè lu tucatu ?

È puru, ùn avia laziu di liticà si cù tutti i so paisani, masimu più per una petra ! Tandu rispose:

- Scusate mi, Madama, ùn sapia micca ch'ella era vostra, issa petra, ma a vi dò subito. Per sfurtuna, accumpagnò Ignaziu a parolla cù u gestu è lampò a petra nantu à Matalena, spavintata. Si sentì un rimore trimendu, un scoppiu cusì forte ch'ellu rimbumbò in tutta a valle. Matalena fù prughjettata parechji metri in daretu è u so corpu senza vita ghjacia, sticchitu sticchitu. Ignaziu firmò stantaratu è quandu a pulizza vense à circà lu, era incapace di prununcià duie parolle.

In fine, dopu esse si sciaccatu dui bichjeri d'acquavita, rispose tartagliulendu à i pulizzeri ch'è li dicianu:

- Avete tombu à Matalena, vi rindite contu ch'è vo l'avete assassinata lampendu li una granata adossu !

- Ghjè...ghjè...ghjè Matalena ch'è hà tombu à mè! M'hà dumandatu di dà li a petra, eo ùn pinsava micca ch'ella era magica issa petra, ma ella, a sapia issa strega, a sapia.

- Una granata, micca una petra, precisò u pulizzeru. Hè chjucutu quant'è a mula d'Orezza, quessu quì!

- Iè, iè, granata s'è vo preferite... Di tutta manera in iss'affaracciu quì, sò una vittima eo! M'anu ingannatu quassù, Diu è tutti i Santi : "Vai ci tù, o Ignà, ch'elli dicianu, perchè tutti santi ch'elli sò, n'avianu pocu laziu, elli, di vene quì ! M'anu ingannatu, vi dicu ! "Vai à vede torna u to paisolu di Vignale. Torna à Vignale ch'è un bellu paese !" Ed eo, sò vinutu quì per amparà ch'è tutta a mio sterpa hè sterpa, ch'è ùn aghju più nè casa nè stazzu è ch'è avale, e petre rimpiazzanu i fucili è so chjamate granate... S'ellu ùn hè micca un ingannu quessu !

- Ch'è n'avemu da fà ? dumandò u pulizzeru à u so cumbinaru.

- Quessa po ùn la sò! Hè mezu ch'è baullu, ùn lu pudemu mancu tene in prigiò, u tumberianu subito. Però, in Vignale, nimu ùn ne vole sente parlà...

- Manc'èiu, rispose Ignaziu briacu à tappu è l'ochji luccichenti. Ùn ci tornu mancu per more! Vogliu andà in Aiacciu, quallà almenu, nimu ùn cunnosce à nimu!

- In Aiacciu, poveru à voi ? lampò u pulizzeru Pons trà duie scaccannate. Ci vole à difende si in Aiacciu, ghjè una cità ! È pazzu cum'è vo site ùn steranu tantu à fà vi

serrà in Castellucciu. Feriate megliu di stallà vi in un paisolu tranquillu. Infine, fate ciò ch'ella vi pare, mi ne lavu e mani !

Una volta liberu, partì Ignaziu versu à Aiacciu, bellu decisu di gode a vita cittadina ma e parolle di u pulizzeru Pons ribumbavanu in la so mente cum'è chjoccu di campana. Qessu u focu, u voli ?

Spavintatu, u corciu giuvanottu si n'andò à trunchera di collu à truvà a pulizza.

- Per pietà, Signore, chì aghju po fattu per merità quessu ? supplicò Ignaziu cù tremuli in a voce.

Quassù i discorsi s'intensificavanu è ognunu dava u so parè. Infine, pigliò Diu a so decisione:

- Cari amichi, disse u Signore cù a so voce putente è sulenna, aghju decisu di porghje aiutu à u nostru cumpagnu Ignaziu, chì osinnò Diu sà ciò ch'ellu pò accade ! Hà fattu penitenza in infernu per voi tutti, pò vene torna in Paradisu. Ma state puru tranquilli, chì a mè ùn mi scummoda mancu à pena d'invià ne torna unu...

I Santi ringrazionu tutti Diu per a so buntà è li dissinu:

- Ùn vi inchietate, Signore caru ! Prima Ghjesù, dopu Ignaziu avà s'è ch'avemu capitu ciò ch'ellu hè l'infernu!

Ghjuvanna Paolacci